

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 222695 22 St
Zenica, 24.1.2025. godine

Općinski sud u Zenici, stečajni sudija Samra Spahić-Drino, u stečajnom postupku nad stečajnim dužnikom „V.A.Š. PARTNER“ Društvo za unutrašnju i vanjsku trgovinu i zastupanje ino-firmi d.o.o. Visoko, sa sjedištem na adresi Zanatski centar Sebilj bb, Visoko, matični registarski broj subjekta upisa 43-01-0330-16 (stari broj 1-23236), nakon ročišta održanog dana 15.10.2024. godine u prisustvu privremenog stečajnog upravnika Vranac Mehmeda i zastupnika po zakonu stečajnog dužnika Pršeš Elmira, van ročišta, dana 24.1.2025. godine donio je:

R J E Š E N J E

Otvara se i zaključuje stečajni postupak nad stečajnim dužnikom „V.A.Š. PARTNER“ d.o.o. Društvo za unutrašnju i vanjsku trgovinu i zastupanje ino-firmi d.o.o. Visoko, ulica Zanatski centar Sebilj bb, Visoko, matični registarski broj subjekta upisa 43-01-0330-16 (stari broj 1-23236), zbog nepostojanja imovine dovoljne za pokriće troškova stečajnog postupka, te se nalaže brisanje ovog privrednog društva iz sudskog registra zavedenog pod matični registarski broj 43-01-0330-16 (stari broj 1-23236), po pravomoćnosti ovoga rješenja.

O b r a z l o ž e n j e

Prijedlogom od 14.12.2022. godine predlagač „V.A.Š. PARTNER“ Društvo za unutrašnju i vanjsku trgovinu i zastupanje ino-firmi d.o.o. Visoko, podnio je ovom sudu prijedlog za otvaranje stečajnog postupka nad navedenim društvom, a koji je po pozivu suda uređen podneskom od 28.3.2023. godine, u kojem je navedeno da se prijedlog podnosi zbog platežne nesposobnosti stečajnog dužnika kojem je račun blokiran duže od 60 dana.

Rješenjem ovog suda od 9.7.2024. godine pokrenut je prethodni postupak za utvrđivanje uvjeta za otvaranje stečajnog postupka nad navedenim društvom, te je radi utvrđivanja uvjeta za otvaranje stečajnog postupka nad ovim društvom za privremenog stečajnog upravnika imenovan Mehmed Vranac iz Visokog.

Iz izvještaja privremenog stečajnog upravnika, koji je dostavljen sudu 11.09.2024. godine, proizilazi da je stečajni upravnik utvrdio da stečajni dužnik nije u mogućnosti financirati svoje poslovanje, da je platežno nesposoban pošto mu je račun neaktivan 60 dana neprekidno, da nije upisan kao vlasnik nekretnina i nosilac prava u katastarskom operatu, da ne prolazi kroz evidenciju vlasnika vozila i da u bilansu stanja na dan 31.12.2023. godine nisu iskazana potraživanja. Dalje je dao mišljenje da postoji razlog za otvaranje stečajnog postupka, da prijedlog nije podnesen u roku, da ne postoji imovina koja je dostatna da se pokriju troškovi otvaranja i vođenja stečajnog postupka, te da se poslovanje ne može nastaviti u toku prethodnog postupka.

Na ročištu koje je održano 15.10.2024. godine privremeni stečajni upravnik je ostao kod izvještaja i mišljenja, te je izjavio da postoji razlog za otvaranje stečajnog postupka, jer je stečajni dužnik platežno nesposoban duže od 60 dana neprekidno, da zakonski zastupnik stečajnog dužnika prijedlog za otvaranje stečajnog postupka nije podnio u roku, odnosno da je prijedlog podnesen 14.12.2022. godine nakon proteka roka od 60 dana računajući od dana nastupanja neaktivnosti transakcijskih računa stečajnog dužnika. Dalje je izjavio da procjenjuje da kod stečajnog dužnika ne postoji imovina koja je dostatna da se pokriju troškovi otvaranja i vođenja stečajnog postupka što je vidljivo iz posljednjih bilansa stanja i uspjeha sa danom 31.12.2023. godine, izjave zakonskog zastupnika stečajnog dužnika od 4.9.2024. godine, uvjerenja Općinskog suda u Visokom Odjeljenju za zemljišno knjižne poslove od 3.9.2024. godine, uvjerenja Općinskog načelnika Službe za katastar urbanizam imovinsko pravne poslove Grada

Visoko od 6.9.2024. godine, te uvjerenja MUP ZDK Sektora za administraciju, Odsjeka za administraciju Visoko od 6.9.2024. godine. Na upit suda da li postoji imovine koja bi bila dovoljna za podmirenje troškova stečajnog postupka, privremeni stečajni upravnik je izjavio da ne postoji imovina u bilo kojem obliku da se pokriju u bilo kojem iznosu troškovi otvaranja i vođenja stečajnog postupka koji bi po procijeni privremenog stečajnog upravnika iznosili 4.000,00 KM.

Zastupnik po zakonu predlagača izjavio je da je saglasan sa navodima i izvještajem privremenog stečajnog upravnika i da nema primjedbi.

Sud je donio odluku kao u izreci iz sljedećih razloga.

Odredbom člana 102. stav 6. Zakona o stečaju („Službene novine F BiH”, broj: 53/21) propisano je da stečajni sudija otvara stečajni postupak nad imovinom stečajnog dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna da namiri troškove postupka, dok je stav 7. istog člana propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u „Službenim novinama Federacije BiH”, pozvati povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka, u iznosu koji odredi stečajni sudija. Stavom 8. istog člana propisano je da ako u roku iz stava 7. ovog člana povjerioci i zainteresirana lica ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak.

Imajući u vidu prethodno navedeno, sud je, primjenom odredbe člana 102. stav 7. Zakona o stečaju, rješenjem od 15.10.2024. godine pozvao povjerioce i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 4.000,00 KM, te da po izvršenoj uplati predujma sudu dostave uplatnicu, kao dokaz da je uplata izvršena. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupku.

Rješenje ovog suda od 15.10.2024. godine objavljeno je na oglasnoj tabli suda 16.10.2024. godine, na web stranici suda 15.10.2024. godine i u „Službenim novinama Federacije BiH” broj: 83/24 od 23.10.2024. godine.

Kako stečajni dužnik ima obaveze, dok nema imovine prema izvještaju privremenog stečajnog upravnika ni za namirenje troškova stečajnog postupka, a povjerioci i zainteresovana lica po proteku roka ostavljenog u rješenju donesenom od strane ovog suda nisu predložili otvaranje stečajnog postupka niti predujmili novčani iznos potreban za pokrivanje troškova stečajnog postupka, to je primjenom odredbe člana 102. stav 8. Zakona o stečajnom postupku, odlučeno kao u izreci ovog rješenja.

Shodno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje uslijed nedostatka mase prestaje postojati, te brisanje ovog pravnog lica iz sudskog registra.

POUKA O PRAVNOM LIJEKU

Protiv ovog rješenja može se izjaviti žalba u roku od 8 dana od dana dostavljanja, Kantonalnom sudu u Zenici putem ovog suda u tri primjerka.

Stečajni sudija

Samra Spahić-Drino